

Bibiliya y' Abana Ishikirije

Pasika Ya Mbere



Yanditswe na: Edward Hughes

Amashusho ashirwamwo na: Janie Forest

Isobanurwa mu Kirundi na: Rémy Christian NTIRURIKURE

Itunganywa na: Lyn Doerksen

Inkuru 54 kuri 60

www.M1914.org

Bible for Children, PO Box 3, Winnipeg, MB R3C 2G1 Canada

Uburenganzira: Murafise uburenganzira bwo kwimura canke gusohora ku mpapuro iyi nkuru mugihe gusa mutayigurisha.

Ikirundi

Kirundi

Umugore yari ahagaze
i ruhande y'umusozi
uriko urwamo rwinshi,
amaso yiwe yuzuye
umubabaro
arangamiza
hejuru araba
ibintu bibi
cane biriko
biraba.


Umuhungu wiwe yaragiye
gupfa. Uyo nyina
yari Mariya,
araheza
ahagarara
hafi y'aho
Yesu bariko
bamuterako
imisumari ku
musaraba.



Mbega ibi vyose vyashitse gute?


Mbega vyoshoboka gute ngo Yesu arangize ubu buzima bwiza mu buryo buteye ubwoba nk'uko?

3



Mbega vyoshoboka gute ngw'Imana ireke Umwana Wayo ngo aterwe imisumari ku musaraba, habe ariho apfira? Mbega Yesu yoba yarakoze ikosa mu kumenya uwo Yari ari? Mbega Imana yarananiwe?

4



Oya! Imana ntiyananiwe. Yesu nta kosa na rimwe yakoze. Yesu yari azi ko azokwicwa n'abantu b'ikibi. Ndetse igihe Yesu yari akiri akayoya, umutama yitwa Simiyoni yari yabwiye Mariya ati umubabaro uri mu misi iri mbere.

5



Imisi mikeya imbere yuko Yesu yicwa, umugore umwe yaje asuka amavuta y'igicro ku birenge Vyiwe. "Yononye amafaranga," abigishwa ba Yesu baridodomba. "Yakoze igikorwa ciza," Yesu arababwira. "Yabikoze kubw'amaziko yanje." Mbega amajambo atangaje.

6




Inyuma y'ivyo, Yuda, umwe muri ba bigishwa cumi na babiri, yemera kugurisha Yesu ku baherezi bakuru ku giciro c'italanto 30 z'ifeza.

7



Ku musu mukuru wa Pasika y'Abayahudi, Yesu yariko arasangira imfungurwa za nyuma n'abigishwa Biwe. arababwira ibintu bitangaje vyerekeye Imana hamwe n'amasezerano yayo kuri abo bayikunda.


8



Hanyuma, Yesu arabaha umukate n'igikombe ngo basangire. Ico cari ikimenyetso co kubibutsa ko umubiri n'amaraso ya Yesu yari atanzwe kugira azane uguharirwa ivyaha.

9

Hanyuma Yesu abwira abagenzi biwe ko aza kugurishwa, kandi ko baza guhunga. "Simpunga," Petero aravuga ashimitse. "Imbere y'uko inkoko ibika, uzoba umaze kunyihakana incuro zitatu," Yesu aramubwira.



10



Inyuma y'aho muri iryo joro nyene, Yesu aja gusenga mw' itongo ry'i Getsemani. Abigishwa bari kumwe nawe bafatwa n'agatiro barasinzira.

11



"O, Data," Yesu arasenga, "... Reka kino gikombe kindengane. Ariko, ntibibe nk'uko ndabishaka, ariko bibe uko ubishaka."

12

Ubwo nyene umugwi w'abantu benshi baza muri rya tongo, barongowe na Yuda. Yesu ntiyigwaniye, ariko Petero aca ugutwi umugabo umwe muri abo. Mu gacerere, Yesu atora kwa gutwi kwa wa mugabo agusubizako aba muzima. Yesu yari azi ko ifatwa Ryiwe ryari umuce w'ubugombe bw'Imana.



13

Uwo mugwi w'abantu utwara Yesu ku nzu y'umuherezi mukuru. Aho nyene, abakuru b'Abayuda bavuga ko Yesu ategerezwa gupfa. Iruhande y'aho, Petero yari ahagaze hafi y'umuriro w'abakozi ariko araraba.



14

Incuro zitatu abantu bararaba Petero baca bavuga, "Wewe warikumwe na Yesu!" Incuro zitatu

Petero arabihakana, nk'uko Yesu yari yabimubwiye. Petero aronavuma yongera ararahira.



15


Inkoko ica irabika

Ubwo nyene, inkoko ica irabika. Yabaye nk'ijwi ry'Imana kuri Petero. Yibutse amajambo ya Yesu, Petero ararira n'intimba nyinshi.




16

Yuda na we nyene yarababaye. Yari azi ko Yesu ata caha canke ikibi icari co cose yakoze.



17

Yuda asubiza za talanto 30 z'ifeza, ariko abaherezi ntibazakira. Yuda aterera ya mafaranga hasi, arasohoka-araheza aja kwiyahura.




18

Abaherezi bazana Yesu kwa Pilato, umutware w'umuroma. Pilato aravuga, "Nta caha mbona kuri uyu Muntu." Ariko ishengeru ry'abantu baguma bashira ijwi hejuru, bati: "N' abambwe! N' abambwe!"




19

Mu nyuma, Pilato aragondoza, araheza acira Yesu urubanza rwo gupfa ku musaraba. Abasoda barakubita Yesu, baramucira amate mu maso Hiwe, kandi bongera baramushishagura.



20


Bamukorera urugori rubi rw'amahwa asongoye cane, baraheza barufyondera ku mutwe Wiwe. Hanyuma, baramutera imisumari bamubamvye ku giti c'umusaraba ngo apfe.



21


Yesu wewe yarasanzwe azi ko Azopfa muri ubwo buryo. Yarazi kandi ko urupfu Rwiwe ruzotanga uguharirwa ku banyavyaha bazoshira ukwizera muri

We. Abambuzi babiri babambwe impande n'impande na Yesu. Umwe yizera Yesu araheza aja mw'i Paradizo. Uyundi ntiyagiyeyo.



22

Inyuma y'amasaha y'umubabaro, Yesu aravuga ati: "birarangiyeye," aca arapfa. Igikorwa Ciwe kiba kirarangutse.



Abagenzi baramuhamba mu mva y'umuntu yari yarikoreshereje.


23

Hanyuma abasoda b'abaroma barazibira bongera barararira iyo mva. Ico gihe rero, nta muntu n'umwe yashobora kwinjira canke gusohoka.




24

Iyo aba aha ariho inkuru yahereye, yari kuba ibaye inkuru mbi. Ariko Imana yakoze ikintu c'igitangaza. Yesu ntiyagumye mu bapfuye!




25

Mu gatondo ka kare k'umusi wa mbere w'indwi, bamwe mu bigishwa ba Yesu basanga ikibuye catembagaye kiva ku mva.




26

Igihe baravye imbere mu mva, Yesu ntiyari akiri aho mu mva.



27

Umugore umwe aguma aho hafi y'imva ariko ararira. Yesu aramwiyereka!



28

Uyo mugore aca ava aho yihuta yuzuye umunezero, aja kubwira abandi bigishwa. "YESU NI MUZIMA! YESU YAZUTSE MU BAPFUYE!"



29

Bidatevye, Yesu aza ku bigishwa biwe, araheza abereka inkovu Ziwe z'imisumari mu biganza Vyawe. Vyari ukuri. YESU YARI YASUBIYE KUBA MUZIMA! Araharira Petero kubera kumwihakana, araheza abwira abigishwa Biwe kubwira abantu bose ivya Yesu. Hanyuma araheza Asubira mw'Ijuru aho yari yaje ava ku Musi wa pasika ya mbere.

30

Pasika Ya Mbere

Inkuru ivuye mw'Ijambo ry'Imana, Bibiliya

tuyisanga muri

Matayo 26-28, Luka 22-24,
Yohana 13-21

"Guhishurirwa amajambo yawe kuzana umuco, guha abatungu ubwenge." Zaburi 119:130

Imana irazi ko twakoze ibibi, ivyo yita icaha. Igihano c, icaha ni urupfu.

Imana iradukunda cane yarungitse umwana wayo, Yesu, gupfa ku musalaba hama ariha igihano cacu. Yesu yasubiye kuba muzima hama asubira mw'ijuru. Ubu rero Imana ishobora kuduharira ivyaha vyacu.

Ushaka kuva mu vyaha, bwira ibi Imana: Mana nziza, Ndizera ko Yesu yapfuye ku bwanje ubu akaba ari muzima. Rero ingo mu buzima bwanje uharire ivyaha vyanje, kugira ubu ngire ubuzima bushasha, hama nze mbane na we ibihe bidashira. Mfasha kubaho ku bwawe nk'umwana wawe. Amen. Yohana 3:16

Soma bibiliya hama uvugane n'Imana iminsi yose.